

Ni Pangulong  
**Henry B. Eyring**  
Unang Manuglaygay  
sa Unang Panguluhan



# Moral nga Kaisog

**I**sa sa mga katuyuan sang mortal nga kabuhi amo ang pamatud-an sa Dios nga sundon naton ang Iya mga kasuguan kon nagakinahanglan ina sing kaisog. Napasaran naton ini nga pagtilaw sa kalibutan sang mga espiritu. Pero may ikatlo nga bahin sa langit nga nagrebelde batok sa panugyan nga pagatilawan sila sa mortal nga kabuhi sa diin may risgo nga indi sila magmadinalag-on.

Antes kita matawo, nakilala naton ang Dios nga Amay kag ang Iya Anak, nga si Jesucristo, sing personal. Makita naton Sila kag mabatian Sila samtang Sila naga-tudlo kag nagapaisog sa aton. Karon isa ka tabon ang ginbutang sa aton mga kaisipan kag handurawan. Si Satanas, ang amay sang tanan nga kabutigan, may bentaha tungod kinahanglan naton nga makita ang realidad kon sin-o kita paagi sa mga mata sang pagtuo, samtang ang aton mga lawas naghimo sa aton nga bukas sa lawasnon nga tentasyon kag sa pisikal nga kahuyang.

May dalagko kita nga mga bulig sa paghatag sa aton sing kaisog sa sining kabuhi. Ang pinakadako amo ang Pagbayad-sala ni Jesucristo. Tungod sa Iya ginhimo, ang mga sala sarang mahugasan paagi sa mga tubig sang pagbunyag. Sarang naton mabag-o inang bugay kon mag-ambit kita sang sakramento nga may pagtuo kag may mahinulsulon nga tagipusuon.

Ang espirituhanon nga mga dulot isa pa gid ka bulig. Ginabaton naton ang Espiritu ni Cristo sa pagkabun-ag. Ina nagahatag sa aton sing gahum nga mahibaluan kon bala ang pagpili nga yara sa aton atubang magadala padulong sa kabuhi nga wala'y katapusan. Ang balaan nga mga kasulatan mga sigurado nga giya kon basahon naton ang mga ini nga kaupod ang Balaan nga Espiritu.

Ang Balaan nga Espiritu nagatugot sa aton sa pagpahayag sang pagpasalamat kag sa pagpangayo sing bulig sa pangamuyo nga may kaathag kag pagsalig nga aton sadto ginatagamtam upod sa aton Amay nga Langitnon kag aton maangkon kon magbalik kita sa Iya. Ina nga komunikasyon upod sa Dios nagabulig sa pagpadula sang kahadlok sa aton mga tagipusuon samtang naga-pabaskog ini sang pagtuo kag paghigugma sa Amay nga Langitnon kag kay Jesucristo.

Ang balaan nga priesthood nagahatag sa aton sing kaisog sa aton pag-alagad. Sa iya sini nga mga ordinansa nagabaton kita sing gahum sa pag-alagad sa mga anak sang Dios kag sa pagpakigbato sa impluwensya sang malain. Kon tawgon Niya kita sa pag-alagad, may yari kita sining saad nga ang sin-o man nga magbaton sa aton, mangin yara man Sia, tungod mangin yara Sia sa aton atubang. Kag mangin yara sa aton natuo nga kamot kag sa aton nawala, kag ang Iya

Espiritu mangin yara sa aton tagipusuon, kag ang Iya nga mga anghelles sa aton palibot, sa pagtib-on sa aton (tan-awa sa D&C 84:88).

Ang Propetang si Joseph Smith may rason nga magkahadlok sa iya pag-alagad. Pero ang Dios naghatag sa iya sing kaisog kaupod sining pagpasalig sa halimbawa sang Manunudlo:

Nagsiling Sia nga kon ginhulog si Joseph Smith sa bubon, ukon sa mga kamot sang mga manugpatay-tawo, kag ginsentensyahan nga mapatay; kon gintagbong sia sa kaidadalman; kon ang nagahuganas nga baha maghimbon batok sa iya; kon ang mabaskog nga unos mangin iya kaaway; kon ang langit nagtipon sing kadulom, kag ang mga elemento magbaral sa alagyan; kag labaw sa tanan, kon ang mismo mga baba sang impiyerno magnganga sing dako sa paglamon sa iya, dapat niya nga mahibaluan nga ining tanan nga mga butang magahatag sa iya sing eksperiensya, kag ini mangin para sa iya kaayuhan.

Ang Ginuo nagsiling nga nag-agì sia sa mas ubos pa sining tanan, kag namangkot nga mas labaw pa bala sia sa iya? (tan-awa sa D&C 122:7–8).

Ang Dios naghatag sa aton sing masobra pa sangsa kinahanglanon nga bulig sa pagdula sing kahadlok kag sa paghatag sing kaisog, kon ano man ang aton atubangan sa kabuhi. Samtang nagadab-ot kita para sa Iya bulig, sarang niya Kita alsahon padulong sinang wala'y katapusan nga kabuhi nga aton ginahandum.

#### PAGTUDLO GIKAN SA SINING MENSAHE

**S**i Jesucristo, ang Punong Manunudlo, masami nga nagapamangkot sa pagpaisog sang mga tawo nga binagbinagon kag idapat ang mga prinsipyo nga lya gintudlo. . . . ang lya nga mga pamangkot nagapadasig sang pagpanghunahuna, pagpangita sang mga sabat, kag debosyon" (*Teaching, No Greater Call* [1999], 68). Panumduma nga maghimo kag magpamangkot sang pila ka mga pamangkot agud buligan ang mga indibidwal nga mahangpan kag madapat ang mga kamatuoran nga ginatudlo sa sining mensahe. Halimbawa, mahimo ka nga magpamangkot, "Ano nga bulig ang ginhatac sa inyo sang Dios agud dulaon ang kahadlok kag hatagan kamo sing kaisog?" ukon "Paano kamo ginbuligan sang

Dios nga malampuwasan ang inyo mga kahadlok?" Paisoga ang mga indibidwal nga binagbinagon ang ilà nga mga sabat antes magpaambit.

## LAMHARON

### Wala sing Perpekto

Ni Shauna Skoubye

**L**uyag ko gid nga mangin kasubong ni Nefi: tuman ka masinulondon, labi ka matinuhon, kag lubos ka espirituhanon. Sa akon panulok si Nefi amo ang pinakamataas nga halimbawa sang kaayo. Pila gid lang ka mga butang ang nagakuha sang akon atensyon sangsa pagpanumdom nga magdako nga kasubong sa iya—ukon bisan man lang sa pag-angkon sang isa ka bahin sang iya kaperpekto.

Isa ka adlaw nakaangkon ako sing isa ka diutay nga krasis, nga gintuga sang mga balatyagon sing kakulangan. Subong sini ang akon ambisyon kag may madamo kaayo nga mga lalab-uton. Pero daw wala man lang ako sing may nalab-ot. Sa tunga sang mga luha sang kapaslawan, ginpahayag ko ining mga balatyagon sa akon amay. Maabitik sia nga nagtindog, nagpadulong sa estante sang mga libro, kag ginkuha ang isa sang iya mga kopya sang Ang Libro ni Mormon. Nga wala sing hulohambal, ginbuksan niya ini sa 2 Nefi 4 kag nagsugod sa pagbasa sang bersikulo 17.

Ang hinali nga kahadlok naglapta sa akon lawas nga daw kuryente samtang nagapamati ako sa sining gamhanan nga mga pulong: "O, kailo ako nga tawo!" Naglibog ang akon hunahuna. Paano si Nefi, ang akon idolo kag halimbawa, makasiling nga sia "kailo"? Kon kailo sia, ano ako 'ya?

Sa liwat, ang kuryente nagpanalaytay sa akon samtang ginabasa sang akon amay ang bersikulo 28: "Magbugtaw, kalag ko!" Indi na magduyo sa sala. Sa akon pamatyag daw pareho yadto nga ang madulom nga mga panganod sa akon kaisipan nagbukas kag naghawan agud ipakita ang kaalabaab kag katahumi sang malapad nga asul nga langit kag masanag nga adlaw. Mabudlay kaayo ilaragway ang paagi nga ginpasanagan sining bersikulo ang akon kalag. Pila lang ka bersikulo sa balaan nga mga kasulatan ang nagpuno sa akon sing subong kasobra nga paglaum, inspirasyon, kag kasadya nga ginhatac sining bersikulo.

Sa bersikulo 30, si Nefi nagsiling sang kon ano mismo ang akon ginapamensar, lamang sa mas gamhanan nga mga pulong: "Ang akon kalag magakasadya sa imo, Dios ko, kag ang bato sang akon kaluwasan." Ining bersikulo nagdala upod sa iya sing mga balatyagon sing kalinong kag kapasalamatana para sa malulo nga kaluoy kag pagpalangga sang Ginuo.

Gintakop sang akon amay ang libro kag ginpaat-hag nga ining mga bersikulo kon kaisa ginatawag nga salmo ni Nefi. Dayon malulo niya nga gintudlo sa akon nga bisan ang pinakabantog nga mga tawo sa kalibutan indi perpekto, kag ining mga tawo kinahanglan nga magkilala sang ila mga kakulangan kay kon indi magmangin bugalon sila kag, gani, indi na bantog.

Nahangpan ko. Indi tungod nga may mga kahuyang ako indi ko na masarangan nga mangin kasubong ni Nefi. Ang pagkilala sang akon mga kahuyang nagdala sa akon nga mas malapit sa kalidad ni Nefi. Bantog si Nefi tungod, lakin na sa pagkamasinulondon kag matnuohon, mapainubuson sia kag handa sa pag-ako sang iya mga kapalahan.

Sumugod sadtong eksperiensiya, ginpalangga ko ining mga pulong ni Nefi. Sa tagsa nga mabasa ko ang mga ini, mabatyagan ko ang pareho nga kakunyag kag inspirasyon subong sang primero ko ini ginbasa. Ang mga bersikulo nagakanta sa akon nga ako anak sang

Dios, nga may ikasarang sang masobra pa sangsa akon mahunahuna. Nakahibalo ako nga kon ako mainunungan kag magpadayon pasulong, indi matakos nga mga bugay ang nagahulat.

## MGA KABATAAN

### Mga Dulot nga Nagahatag sa Aton sing Kaisog

**S**i Pangulong Eyring nagsugid sa aton parte sa pila ka mga dulot nga nagahatag sa aton sing kaisog. Basaha ang tagsa ka balaan nga mga kasulatan sa idalom, kag isulat ang ngalan sang dulot sa blangko. Hambali upod sang inyo pamilya kon paano inang dulot makahatag sa inyo sing kaisog.

1. Mga Binuhatan 22:16 \_\_\_\_\_

2.2 Nefi 4:15 \_\_\_\_\_

3. D&C 59:8–9 \_\_\_\_\_

4.2 Nefi 32:5; Juan 14:26–27 \_\_\_\_\_

5.1 Mga Taga-Tesalonica 5:17 \_\_\_\_\_

© 2009 iya sang Intellectual Reserve, Inc. Tanan nga mga kinamatarongгинahuptan. Ginbalhag sa Pilipinas. Petsa sang pagtugot sa Ingles: 6/09. Petsa sang pagtugot sa paglubad: 6/09. Linubad sang *First Presidency Message, March 2010*. Hiligaynon. 09363 861

# Pagpabakod sang Pagtuo sa Dios nga Amay kag kay Jesucristo paagi sa Personal nga Pagtuon sang Balaan nga mga Kasulatan



*Itudlo ining balaan  
nga mga kasulatan  
kag sinambit nga  
mga pulong ukon,  
kon kinahanglanon, isa pa ka  
prinsipyo nga magabugay sa  
mga utod nga babayi nga inyo  
ginabisita. Magpanaksihon parte  
sa doktrina. Agdaha ang inyo mga  
ginabisita nga magpaambit sang ilia  
nabatyagan kag natun-an.*

“Sang bag-o pa lang ako gin-kasal, . . . gin-agda ako sa isa ka panyaga para sa tanan nga kauturan nga babayi sa Relief Society sa akon ward nga nakabasa sang Ang Libro ni Mormon ukon sang isa ka libro sang malip-ot nga kasaysayan sang Simbahan. Nangin pasapayan na ako sa akon pagbasa sang balaan nga mga kasulatan, gani nakapasar ako nga magtambong sang panyaga paagi sa pagbasa sang isa ka malip-ot nga libro tungod mas mahapos ini kag madali lang basahon. Sang nagakaon ako, may isaako ka mabaskog nga pamatyagon nga bisan pa maayo nga balasahon ang libro sang kasaysayan, dapat ko kuntani ginbasa Ang Libro ni Mormon. Ang Balaan nga Espiritu nagapadasig sa akon nga bag-uhon ang akon pamatasan sa pagbasa sang balaan

nga mga kasulatan. Sina mismo nga adlaw ginsugdan ko nga basahon Ang Libro ni Mormon, kag wala na ako mag-untat. . . . Tungod ginsugdan ko nga basahon ang balaan nga mga kasulatan adlaw-adlaw, natunan ko ang parte sa akon Amay nga Langitnon, sa Iya Anak nga si Jesucristo, kag kon ano ang kinahanglan ko himuong agud mangin pareho sa Ilia. . . .

Ang tagsa ka babayi sarang manginisa ka manunudlo sang doktrina sang ebanghelyo sa iya puluy-an, kag ang tagsa ka utod nga babayi sa Simbahan nagakinahanglan sing ihibalo sa ebanghelyo bilang isa ka lider kag manunudlo. Kon wala mo pa maestablizar ang pamatasan sang adlaw-adlaw nga pagtuon sang balaan nga mga kasulatan, magsugod na subong kag magpadayon sa pagtuon agud magmangin handa para sa imo mga responsibilidad sa sining kabuhi kag sa mga wala'y katapusan.<sup>1</sup>

*Julie B. Beck, pangkabilugan nga pangulo sang Relief Society.*

“Ang pagtuon sang balaan nga mga kasulatan magabulig sa aton mga panaksihon kag sa mga panaksihon sang mga miyembro sang aton pamilya. Ang aton kabataan sa karon nga panahon nagadalagko

## MGA BULIG PARA SA VISITING TEACHING

Sa tion sang inyo pagbisita, sabta ang mga pamangkot kag magpaambit sang mga pagpasanag nga nagagamit sang balaan nga mga kasulatan. Magpaambit sang panaksihon kon paano ang pagtuon sang balaan nga mga kasulatan nagpabakod sang inyo pagtuo. Agdaha ang utod nga babayi nga inyo ginabisita nga magpaambit kon paano ang iya pagtuon sang balaan nga mga kasulatan nagpabakod sang iya puluy-an kag pamilya.

## PERSONAL NGA PAGPANGHANDA

Juan 5:39

2 Timoteo 3:14–17

2 Nefi 9:50–51; 31:20; 32:3–5

D&C 138:1–11

nga ginapalibutan sang mga tingug nga nagaimpluwensya sa ilia nga sikwayon ang inang matarong, kag sundon, sa baylo, ang mga kalingawan sang kalibutan. Magluwas kon may mabakod sila nga pundasyon sa ebanghelyo ni Jesucristo, isa ka panaksihon sang kamatuoran, kag

isa ka determinasyon nga magpangabuhi sing matarong, mangin mahuyang sila sa sining mga impluwensya. Aton ang responsibilidad nga pabakuron sila kag protektahanan.”<sup>2</sup>

**Pangulong Thomas S. Monson.**

“Luyag namon nga ang aton kauturan nga mga babayi magmangin mga mangin-alamon sa balaan nga mga kasulatan. . . . Kinahanglan ninyo sing ihibalo sang iya wala’y katapusan nga mga kamatuoran para sa inyo

mismo nga kaayuhan, kag para sa katuyuan sa pagtudlo sang inyo kaugalingon nga kabataan kag sang iban pa nga malikupan sang inyo impluwensya.”<sup>3</sup>

“Luyag naton nga mabugayan ang aton mga puluy-an sang mga babayi nga mangin-alamon sa balaan nga kasulatan—bisan pa nga solo-lawas ukon kasado, lamharon ukon tigulang, balo ukon nagapuyo upod sa isa ka pamilya. Magmangin maalam sa balaan nga mga kasulatan—indi agud itamay ang iban,

kundi agud itib-ong sila!”<sup>4</sup>

**Pangulong Spencer W. Kimball  
(1895–1985).**

**MGA TANDA**

1. Julie B. Beck, “My Soul Delighteth in the Scriptures,” *Liahona*, Mayo 2004, 107–9.
2. Thomas S. Monson, “Three Goals to Guide You,” *Liahona*, Nob. 2007, 118.
3. Spencer W. Kimball, “Privileges and Responsibilities of Sisters,” *Ensign*, Nob. 1978, 102.
4. Spencer W. Kimball, “The Role of Righteous Women,” *Ensign*, Nob. 1979, 102.

© 2009 iya sang Intellectual Reserve, Inc. Tanan nga mga kinamarong ginahuptan. Ginbalhag sa Pilipinas. Petsa sang pagtugot sa Ingles: 6/09. Petsa sang pagtugot sa paglubad: 6/09. Linubad sang *Visiting Teaching Message, March 2010*. Hiligaynon. 09363 861